

Landesbibliothek Oldenburg

Digitalisierung von Drucken

Jahrbuch für das Oldenburger Münsterland

Vechta, Oldb, 1969-

Gertrud Herzog: Schneinacht

urn:nbn:de:gbv:45:1-5285

„Wat wör dor änners noch?“, wull Harm wäten. „Och, och, ne, änners nicks“, füng August an tau stäätern. „August“, mennde Harm, „hei schull di gründlick van ünnern bit baoben ünnerseuken, häff hei denn änners nicks funnen?“ „Doch, dat wör ganz schön spietlick. Buur, ick har doch bi dei Küll siet fief Wäken dei Fäute nich mehr waschket, un gi häbbt mi nich säggt, dat man bi Koppkälte uck dei Strümpe uttrecken möss.“

Gertrud Herzog

Schneinacht

Winterwaldnacht, still un klaor,
mit iesbesetten Twiegen,
blinkert, glemmt, schneilastschwaor,
so stolz, dien hochnäseget Schwiegen.

Wat schinnt dei Vullmaond witt un koolt,
maolt lechtgries düstere Schatten,
wedd nu langsaom rein tau oolt,
schlick sinnig, at so'n graue Katten.

Dei Väögel freist, dat Wild hätt nix tau bieten,
dat Waoter früss, dei Bööm' staohrt stief,
dei Kinner käönt den Schneiball schmieten,
väл Menschken quält dat vulle Liew.

Un in aal Dörper sinnig sacht,
dor hollt dei Welt den Aom an,
in Winterstied, in düstere Nacht,
dröömt aals, dat't Frieden gäben kann.

Martin Pille

Generation gap

Also, freuher geef dat sowat nich. Un van daoge näumt sei dat „Antiautoritäre Erziehung“ oder uck „Generation gap“. Dat is Inglisch un bedütt, dei Kinner wätet nich, wat dei Öllern wüllt, un dei Öllern wätet nich, wo dei Kinner up los wüllt. Wenn dei Kinner maol richtig Mess maoket hebbt, dann wedd dat ers maol richtig utdiskutiert. Wat sünd dat för Tieden. Freuher – jao, freuher geef dat sowat nich. Dor schlöög dei Pappen maol düchtig up 'n Disch. Man vandaoge – wenn du van daoge up 'n Disch haust, dann is hei glieks in Dutt!

Ick wör bi familia. Vör dei Kasse wör 'ne lange Schlange van Lüe. Dor stünd 'n ölleret Fraumenschke vörne un dorachter 'n junget Fraumenschke mit ehren lüttken Bussen – mück woll so üm nägen Johr olt wän hebbten. Un dei schöow uck den Inkoopswaogen, un as hei teuwen mösste, stöttde hei mit den Waogen immer weer gägen dei Beine van dei Oma.

As dat öwerhaup nich uphörde, sägg dei Oma tauleßte tau dat junge Fraumenschke, off sei ehren Jungen nicht säggen kunn, dat hei dormit uphören schull, dat külld ehr all richtig. Kiek, un nu kummp dat, wo dat Ende van wäge is. Dei Frau dreihde sick blots half ümme, steek ehre Näsen noch 'n bätzen höger un mennde dann luut, dat aale Lüe dat verstaohn kunnen: „Ich erziehe mein Kind antiautoritär! Wenn es Lust dazu hat, dann darf es das auch ruhig tun.“

Up 'n Fleck wör dat rundherüm mucksmüskenstill. Achter disse Frau stünd 'n jungen Kerl. Dei greep seelenruhig in sienem Inkoopswaogen, nöhm dorut 'n Glas Hönnig, dreihde den Deckel off un gööt dat ganze Glas äower den Kopp van dat junge Fraumenschke ut. Du kanns di nich vörstelln, wo dei dat nu angüng. Aober dei junge Mann bleew ganz ruhig un mennde dann ganz cool: „Ick har jüst Lust dortau. Un, dormit sei maol seiht, wat ut ehren Jungen wedd, wenn hei groot is: Ick bünn nämlick uck antiautoritär ertrucken.“